

NO. SOALAN : 41

PEMBERITAHUAN PERTANYAAN BAGI JAWAPAN LISAN
MESYUARAT PERTAMA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN TONY PUA KIAM WEE

TARIKH : 14 MAC 2016 (ISNIN)

SOALAN :

Tuan Tony Pua Kiam Wee [Petaling Jaya Utara] minta **PERDANA MENTERI** menyatakan sama ada kelulusan atau perjanjian konsesi Lebuhraya Serdang-Kinrara-Putrajaya (SKIP) telah dimuktamadkan dan tarikh berkaitan. Apakah terma-terma utama konsesi ini termasuk nilai dan tempoh, dan apakah kelayakan dan kepakaran pihak pemegang konsesi.

JAWAPAN: YB SENATOR DATO' SRI ABDUL WAHID OMAR,
MENTERI DI JABATAN PERDANA MENTERI

Tuan Yang Di Pertua,

Kerajaan sentiasa komited dan berusaha untuk menyediakan lebuh raya yang terbaik bagi kemudahan rakyat. Sehubungan dengan itu, Kerajaan telah bersetuju dengan pelaksanaan projek Lebuh raya SKIP melalui kaedah penswastaan. Projek lebuhraya ini melibatkan jajaran sejauh 28.4 km dengan anggaran kos sebanyak RM2,202 juta dan tempoh konsesi selama 54 tahun. Jajaran lebuh raya ini bermula dari Kinrara melalui kawasan Serdang dan berakhir di Putrajaya. Pembinaan lebuhraya SKIP ini akan memberi banyak manfaat kepada penduduk sekitarnya, seperti berikut:

- sebagai jalan penghubung yang selesa dalam menghubungkan antara kawasan Serdang, Kinrara, Puchong dan Putrajaya;
- sebagai laluan alternatif kepada lebuhraya sediada seperti Lebuhraya Damansara Puchong (LDP);
- mengurangkan masalah kesesakan trafik yang teruk pada waktu puncak bagi penduduk di sekitar kawasan Kinrara, Puchong dan Serdang; dan
- mengurangkan jarak dan tempoh masa perjalanan, misalnya, pengguna dapat menjimatkan masa perjalanan sebanyak 10-15 minit daripada bandar Kinrara ke Putrajaya dengan menggunakan lebuh raya SKIP berbanding menggunakan lebuh raya LDP.

Untuk makluman ahli-ahli Dewan yang mulia ini, pada masa ini, rundingan akhir sedang dijalankan di antara pihak Kerajaan dan syarikat berkaitan dengan aspek teknikal, kewangan dan perundangan bagi tujuan memuktamadkan perjanjian konsesi.

Sekian, terima kasih.